



Agora iha ona informasaun kona-ba Planta Enerjia Oleu Pezadu Komunikadu imprensa husi La'ó Hamutuk, 3 Marsu 2009

Too agora, informasaun tekniku kona-ba projeitu aloka osan tokon \$375 atu halo jenerasaun estasaun eletrisidade oleu pezadu no rede distribuisaun nasional ida iha Timor-Leste subar metin la fó sai ba publiku. Oficial Governu sira orgulhu tebes ba saida mak sira hein atu hetan husi projeitu enerjia oleu pezadu ne'e. Maibe, sira nafatin rejenta atu fó sai dokumentu konkretu ka informasaun kona-ba aspeitu tekniku, kontraktu, parte fiziku, ambiente no aspeitu seluk husi projeitu ne'e ba publiku.

Atu ajuda povu Timor-Leste no lider sira hodi kompriende di'ak liu kona-ba projeitu boot ne'e, NGO lokal La'ó Hamutuk hetan ona kopia proposal ne'ebé mak halo ona iha fulan Junhu tinan kotuk ba Governu Timor-Leste husi Kompanha Konstrusaun Nuklear Xina #22, ne'ebé manan ona kontraktu ba projeitu ne'e iha fulan Outobru tinan kotuk.

Maske iha ona alterasaun balun iha proposal projeitu ne'ebé hakerek ona ne'e, inkluidu aumenta tan fatin elektriku ida iha Hera, ne'e fó informasaun barak liu duke buat ne'ebé mak iha ona. Kompanha argumenta makaas atu uza gerador oleu pezadu tuan hanesan dalan ne'ebé lalais no baratu liu ba elektrifikasaun, nune'e fo informasaun balun deit no dala-wain la klaru no inkonsistente, kona-ba planu atu hamenus sira-nia kontribuisaun ba estragu ambiental.

Maibe, proposal no informasaun seluk ne'ebé ami hetan husi entrevista no lia-anin hamosu pergunta barak nanu'u mos resposta. La'ó Hamutuk sei kontinua halibur, analiza no publika informasaun kona-ba projeitu ne'e, no ami hein-nafatin atu simu material ruma husi parte hotu. Ba buat ne'ebé mak bazea ba informasaun los – laos promesa, rumor ka akuzasaun partisan – ne'ebé tulun povu Timor-Leste no lider sira sei bele halo dezisaun matenek ba ita-nia nasaun nia dezenvolvimentu.

La'ó Hamutuk analiza, kria ligasaun no hatama pajina ba informasaun kona-ba projeitu ne'e iha <http://www.laohamutuk.org/Oil/Power/08PowerPlant.htm> (Ingles no Tetum).
Bele hasai proposal husi kompanha iha <http://www.laohamutuk.org/Oil/Power/CHI22proposals.pdf> (iha deit Ingles).

Emasira ne'ebé labele hetan asesu ba internet bele hakbesik an mai edifisiu La'ó Hamutuk iha Asosiasain Hak nia kotuk iha Farol, atu hetan informasaun no material sira ne'e.

